

HO ETSOA SETLAMA LE KRESTE

 Ke u leboha, haholo. Ke thabetsé ho khutla, ka Lebitso la Morena. Lentsoe le batla le chele, le ho qala, empa Morena o tla ntumella ho kena gereng ea bobeli, ka morao ho nakoana. Ka baka leo, ke buile haholo vekeng ena, kopanong. 'Me ho bile le lipotso tse ngata tse lokelang ho arabjoa. U ntoo tsoa ka mohahong, ho a chesa. 'Me ke... Ha kea ts'oaroa ke sefuba se se be. 'Me ha ke eso ikutloe hantle ho feta, bophelong ba ka. Ka baka leo, ke ikutloa monate, 'metso oa ka o mpa o sebelitse ho feta tekano. 'Me ho tla itokela. Ka baka leo ke batla ho leboha e mong le e mong oa lona, ka sohle seo le se entseng.

² Ke ile ka leka ho fumana... Eitse ha ke chaela ke atamela, metsotsong e 'Maloa e fetileng. Billy o ne a eme ka ntle le batho ba 'Maloa, ba leka ho fumana lelapanyana le ileng la tla la mpa la chona, 'me ha ba khone ho khutla. Ha ba le teng ka mohahong, ke lakatsa ha ba bang... ba ka phahamisa letsoho la bona, kapa—kapa ntho e 'ngoe. Ke—ke batla ho ba le kabelo mono, ka bona. 'Me ka baka leo lelapanyana leo le tsoang Michigan, kapa nqa e 'ngoe, le—le feletsoeng ke mafura kapa ntho e 'ngoe, kapa chelete. Ha le—ha eba le sa le teng motseng... Ha le ka kopana le bona ka morao ho kopano, le ba fetise lapeng ha ka. Le a bona? Ke batla ho ba le kabelo tabeng eo. Ke seo—ke seo... Ke seo re tlelang tlelang mona, ke ho thusa, motho eo re ka khonang ho mo thusa. Ka baka leo, joale, Morena Jesu a re hlohonolofatse, ke thapelo ea rona.

³ Joale, ebile veke e sa tloaeleheng ena, ra ba ra hlaheloa ke tse ling tsa lintho tse sa tloaeleheng. Empa nka re ha ke eso bone mohla Moea o Halalelang o ne o tsamaea ka tokoloho ho feta ka moo O khonneng vekeng ena, ka ts'ebeletsong, ho ne ho babatseha ka tsela e phethehileng ho 'na. 'Me bosiu ha ke kena, ka nako tse ling le pele ke khaleha e se e le hora ea pele mesong. Ke thabisoa ke menahano ea ka moo Morena Jesu a leng mosa ho rona. 'Me joale ke...

⁴ Mang le mang oa batho, ba motseng mona, kapa ba ahileng mathokong, ea eso fumane lehae, kereke ea lehae, u amohetsoe mona, ho tla nako efe feela ho e fetola lehae la hao. Hopolang, ha re na lengolo la botho mona, haese kopano ea botsoalle ho bohle. "Ha re na," joalo ka ha Howard Cadle a naa bolele, "ha ho molao ka ntle ho lerato; ha ho tumelo ka ntle ho Kreste; ha ho buka ntle le Bibele." 'Me ka baka leo le amohetsoe ka mehla tabernakeleng ena e nyenyane.

Etsoe, re lebeletse, ha Morena a rata, kapele ha re khona, ho haha kereke e kholoanyane, sebaka se se ngata—se ngata ho feta. E sang kholo hakaalo, hoba rea lumela Jesu o tla kapele,

'me ha re batle ntho e mabekbeke haholo. Rempa re batla... Ena e se e le mothating oa ho oela. E qetile mosebetsi oa eona, 'me re e leboha haholo.

Nke ke ka lebala. Hantle moo sefala sena se hlonngoeng joale, lilemo tse ka bang mashome a mabeli tse fetileng, ke ile ka khumama ka har'a lets'a la khale, mahola a khurumelitse hloho ea ka. Eaba Morena o re, "Haha kereke ea hao mona." Tulonyaneng, eo re e fumaneng ho Ingram's ka lidolara tse lekholo le mashome a ts'eletseng, ha eba re ne re ka se tlatsa. Lena e ne e le lets'a la leqhoa moo re ne re thellisa.

⁵ Moena Jess Spencer o tlamehile ho hopola, ho ne ho ena le lets'a mona, eena le Khaitseli Spencer. Kea kholoa lea e hopola. Ba ne ba ee ba tlise lihlopha mona, 'me ba ne ba pota ka *mona*, ho koekoetla lets'a.

Ke le moshanyana mona Ingramville School. Mona e ne e le lets'a; re tla koano ho thellisa, le—le ho bapala re hloa re theoha lifate le ntho e 'ngoe le e 'ngoe, lets'eng. Moena Mike, u sa hopola ho sa na le lets'a mona. [Moena Mike o re, "E."—Mong.] E, monghali. Moena Roy, morao mane.

'Me joale, moo lets'a le ne le le teng, re siile karolo ea lona, ke hantle ka morao ka *mona*. Ke hona moo re kolobetsang batho metsing ts'oareleng ea libe tsa bona. 'Me joale taba ena...

⁶ Le a tseba, ha le tla ka lipotso, 'me le—le na le seo le batlang ho se hlahisa, ho ba boima hoba u fumana lets'ole le kopaneng. Batho ba rutiloe ka tsela ena le eane. Empa ha u khona ho hhalosa ntho, esita leha e le khahlano le seo ba se rutiloeng, 'me mosa oa moea o phalla, ho 'na, ke khalalelo.

Ha ke batle ho bitsa lebitso lefe. Empa e—e ngaka e itseng, e tsoang ka ntle ho motse, u sa tsoa kopana le 'na ka phaposing ka mane; ngaka ea meriana, kea kholoa. 'Me, a re, e se e le lilemo a tso'asehile mono. O ne a balile buka e buang ka taba eo, khahlano le seo ke ne ke se ruta. Empa, a re, ereka ha a kile a lula ka har'a kopano, a bile a bone linnete tsa Lengolo li beoa, eaba ho felile ka mehla.

⁷ Nakaoaneng e fetileng, ke kopane le batho, ka phaposing ba tsoang ka ntle ho motse, Illinois. 'Me ho ena le bareri ba ka bang bane, bareri ba bararo kapa bane. 'Me ba re, "Moena Branham, re rutile khahlano, bophelo ba rona bohle, empa joale re chabeloa ke pono 'Me re bona hantle seo 'Nete e leng sona. E sa le re ipotsa hore e ne e le eng." Le a bona? 'Me joale, seo, le a bona, ke seo re leng sona joale...

⁸ Seo e leng sona, moena, le se nahane ha taba eo e tlotlolla kereke kapa batho bafe. Hoo ho mpa ho nyollela Kereke holimo. Le a bona? 'Me joale, re ts'oanetse ho ema, 'moho. Re ts'oanetse ho ema 'Moho. Ha batho...

Mohla Molimo a ne a Ikarola Pentekosta, a pshatla Topallo ea Mollo a e fetola malakabenyana, a manyenyane a litopallo tsa Mollo, 'me e tloha e lopalla holim'a batho, 'me Moea o Halalelang o theohela holim'a bona. Efela ha Molimo A ikarotse har'a rona, nako le nako ha motho a ekeletsoa ho rona, hoo ho atolosa Topallo eo, ka linako tsohle. 'Me hammoho, mohla e fetohang Kereke e kholo e lefeletsoeng ea Molimo, e kopana 'Moho, re tla nka leeto le haolang sebakeng, ruri.

⁹ Ha ke eso leke ho arola kapa ho jala liphapang har'a baena. Ke lekile ka bokhoni ba matla a ka ho ba mosa ka moo ke khonneng, ho utloisia. 'Me—'me banna ba bang, ha eba ba...likereke tse ts'ehetsang kopano ea ka. Joale ha eba ba...Li a fapania, empa lia nthata, 'me li ee li ts'ehetse likopano tsa ka. 'Me ke ee ke kene har'a batho ba tsona, 'me ka tloaelo ha ke bue letho. E—e monna oa boits'oaro a ke ke a etsa joalo, ha ke sa bua ka Mokreste. Ruri a ke ke.

'Me ha nka ts'oara likopano tsa tente; e leng seo ke hopotseng ho se etsa, ha Morena a rata, ka tsatsi le leng. Joale pele, ke—ke ruta ntho efe feela mabapi le lithuto tsena, pele ho tla ts'oaroa lits'ebeletso tsa hoseng le balisa, ka matsatsi a 'Maloa, ho ba tsebisa seo ke ikemiseltseng ho se ruta. 'Me ha moena a sa e bone a sa lumellane, moena ofe feela, joale ba ka nka phutheho ea bona, ba re, "Joale, ha ke batle ha le utloa taba ena. Re tla sala ha ba ruta Hoo." Le a bona? Le ho ba fa monyetla. Kamehla re batla ho lula kutloanobg le Molimo le bana ba Hae, le motho e mong le e mong.

¹⁰ Ka baka leo, joale, ke ts'oanetse ho araba potso bosiu bona, ha Morena a rata. 'Me ke ne ke hopotse ho araba potso ena, pele feela. Eka ke ne ke ena le e 'ngoe mona, empa e ne e le toro e tsoang ho motho e mong, 'me a batla ke rapele ka eona le ho fana ka koahollo. Etsoe, Morena a re hauhetse haholo, ho etsa hoo, ha ngata.

¹¹ Joale, re batla le tsebe, pele re qala ts'ebeletso, hore bohle le boela le memeloa kopano e 'ngoe le e 'ngoe ka lerato, nako le nako ha re e ts'oore. Le ho tsoa Louisville, ho tsoa ka ntle ho motse, ho tsoa motseng le ka mathoko; bareri bana ba khabane; moena ea tsoang Sellersburg; libini; mofumahali eane, e leng hore ke mang, ea n'a bina mono, nakoana e fetileng, le mothaka eo. Re le leboha, re tiile. Ke—ke ne ke qoqa le baena ba 'Maloa morao mane, 'me ha kea fumana le monyetla oa ho sheba hore e ne e le mang, le seo e ne e le sona, empa ruri ke e utloile. 'Me e ne e le monate, 'me ruri ke ananela boikhathatso boo. Joale re tla...

¹² Ke fositse ena maobane bosiu. Mora oa ka o e kentse mokotleng oa ka. E ngotsoe ke motho e mong ea ratehang. 'Me joale le hopole, lipotso tsena ha lia etsetsoa ho fapania. Ka linako tse ling, mohlomong, ha li ngoloa, eka li fapania, empa

ke pelo e ts'epehang e lekang ho fumana. Le a bona? Ke kamoo re e atamelang, motho e mong ea ts'epahalang o leka ho fumana se nepahetseng.

¹³ Joale, ha se khale mona, ke ne ke etetse lelapa, ho ts'oeroe ts'ebeletso ea thapelo. 'Me Moena Junior, ke mo utloile nakoana e fetileng, kapa ke kholoa joalo, a tsamaea le 'na. 'Me o n'a sa tsoa bua. 'Me moreri e mong ea tsoang kerekeng e 'ngoe a lutse mono. 'Me le pele ke hata fulurung, a tlola a qalella, a batla ho mphehis a khang. Che, 'me bareri ba ka bang bahlano ba ne ba lutse mono, 'me ba itokisetsa ho phothoma monna eo hang. Ka re, "Che. Le se etse joalo. Joale, o-o mphephelitse, joale e reng 'na le eena re lokise litaba."

Che, a qala, "Re bua moo Bibele e buang; re thola moo E tholang," le joalo-joalo. Eaba ba tloha. 'Me metsotsong e 'Maloa feela... Ka 'na ka ts'oaea Mangolo ao a hhalosang ka phoso, a bea tulong e phoso. Ho re, "Ho ne ho se letho... Ke batho ba leshome le metso e 'Meli feela ba amohetseng Moea o Halalelang. Bona e ne e le baapostola ba leshome le metso e 'Meli. 'Me pholiso ea Khalalelo e ne e Neiloe ba leshome le metso e 'Meli bao," le joalo-joalo. Ha ho le joalo, le a bona, a fosa tekele, ka limilione tsa limaele. Ka baka leo ka morao... ka mora hoba ke... Hoba a bue halofo ea hora, ka 'Motsa... 'Me a re ke Liabolosi.

¹⁴ Joale he, hoba ke qete ho bua, ka re, "Joale, ntho ea pele eo ke batlang ho e bua, moena, ke u ts'oarela hoo, hoba u ne u sa ikemisetsa hona. Kea tseba u ne u sa ikemisetsa. Hoba, ha ke le moreri, le uena u le moreri, re tlamehile ho ba baena." Le a bona? Eaba ke re, "Joale, ho se utloisisane, Lengolong, ke ntho e fapaneng."

¹⁵ Ka hona ra qalella ho nka Lengolo. 'Me motho oa batho keha a lahlehile hona, metsotsong, a sa tsebe moo a ka emang kapa seo a ka se etsang. Eaba, o ts'oaseha, hoo a sa kang a tseba hore a etse eng. 'Me eena, ha a tsoa ka phaposing, leha ho le joalo, bosius boo, a re, "Ke tla bua ntho e le 'ngoe, Moena Branham. U na le Moea oa Kreste." Le a bona?

'Me ka nahana, "'Liabolosi,' metsotsong e 'Maloa e fetileng, 'me joale, 'moea oa Kreste.'" Ke ka moo u e atamelang kateng. Ke phetho. Kreste ha a etsetsoa ho pheha khang.

¹⁶ Joale—joale, monna eo, kahobane a entse hoo, a lhahela ke lintho tse nyarosang; a batla a lahleheloa ke kelelo ea hae. Tulong ea batho ba sa itekanelang kapa ntho e 'ngoe, a qhoma a tsoa ka fensetere, 'me a batla a ipolaea. 'Me joale o khutlela ho metsoalle ea ka e khabane. O batla, letsatsi le letsatsi, kolobeto ea Moea o Halalelang. O batla ho tla ha ka, ho beoa matsoho, ho amohela Moea o Halalelang; moreri oa kereke e hlophisitsoeng. Le a bona?

¹⁷ Ka baka leo, re arab a lipotso ka pelo tse ts'epahalang, ka hohle ka moo re tsebang ho arab a.

¹⁸ 'Me joale ke tla bala potso ena, e ngotsoe hantle.

1. Moena Branham, na u ka hlalosa hobaneng ha batho ba ho Liketso 2:4 ba buile ka maleme kapa lipuo, le pele bongata bo phutheha ho Liketso 2:6?

Ke potso ea pele. Ee. Ke motho a le mong, kea kholoa, hape. E, ke motho a le mong.

¹⁹ Che, joale, ha le ka elelloa, moena, khaitseli, kapa mang feela ea e ngotseng. Ha ho letho le buang ka ho theoha ha bona, ba tsoa ka holimo. 'Me le bongata bo ne bo se kaholimo. Empa eitse ha ba theohela mabaleng moo bongata bo ne bo phuthehile, ke hona ha ba ne ba ba utloa ba bua kalipuo. Le a bona? Le a bona?

²⁰ Joale, u ka re, "Che, ba ile ba bua holimo mono."

'Me ha eba e ne e le ngangisano kapa khang, u ka ba le tokelo ea ho re, "Ha ba ka ba bua pele ba fihla tlase mona, hobane, 'Eare hobane molumo oo o utluoe.'" Le a bona?

Joale, ntho e 'ngoe mona, e tsamaea le eona.

2. Ana u ka hlalosa Simone o tsebile joang hore Moea o Halalelang o abiloe ho Liketso 8:18? Ke Samaria.

²¹ Che, ho na le ntho e le 'ngoe, ha a tseba ba amohetse Moea o Halalelang ka ho bua ka maleme, le Bibele ha ea bolela joalo ka bona. Ba mpa ba bone litholoana. Ha ho motho ea ka amohelang Moea o Halalelang ho sa etsahale letho ho eena. Ke 'nete. Empa ha ea ba hlalosa ba buile ka maleme mono, ka baka leo o tlamehile a ba a bone ntho e ho sele le ho bua ka leleme, kahobane e sa ba hlalosa ka ho bua ka leleme.

3. U b'u hlalose re tseba joang hore batho ba bang ka Letsatsi la Pentekonta ba buile se-Galilea.

²² Karolo e kholo ea bona mona e ne e le ba-Galilea. 'Me bao bohole... Joale, joalo ka ha ke buile hoseng hona... Joale, ho na le lintho tse peli, matla a mabeli a tsebo. Joale, ke tla emela lehlakore la hore batho ba ne ba bua ka maleme; batho ba ne ba sa bue ka maleme, empas ka lipuo, ha ba ne ba tsoa phaposing e kaholimo 'Me ba qala ba kopana le batho. Empa ha le ka bala Lengolo, mamelang ka hloko.

...baohase ba-Galilea ba buang kaofela ha bona?

Ho ea ka'ng ha re ba utloa—ha re ba utloa ba bua puo, eo e mong le e mong oa rona a tsoaletsoeng ho eona?

...baohase ba-Galilea ba buang kaofela ha bona?

²³ Mohlomong ba ne ba bua se-Galelea, ba mpa ba ba utloa ka puo e 'ngoe. Mohlomong ba ne ba bua ka puo e 'ngoe, puo ea bona. Ka mokhoa ofe feela, ha ho etse taba; e sa ntse e sa batalatse mohopolo oa Pentekosta. Le a bona? Hobane... Mamelang. Lebaka ke lena. Ha se ho bua ntho e

fapaneng, empa ho otlolla ntlha. Ha le ka eleloa, hobaneng Petrose a il'a ema a bua le bongata bohole, 'me e mong le e mong a utloa puo a n'a e bua. Hoba, ho bile ha sokoloha likete tse tharo, tsa ba-Juda ba tiisetsang ba chesehelang tumelo ea bona ruri. Empa mohlomong ba ema, ba utloisia lentsoe le leng le le leng, la Petrose ea rerang ka baporofeta, le joalo, ho fihla koano Pentekosta. Hoba ba ile ba hooa, 'me ba re, "Banab'eso, re tla etsa joang ho bolokeha?"

Petrose a re, "Bakang, le kolobetsoe e mong le e mong oa lona ka Lebitso la Jesu Kreste ts'oarelong ea sebe sa lona."

²⁴ Joale ha nke ke bue taba ena, ka—ka . . . pelo ea ka eohle, le tle le bone . . . seo ke lekang ho le fetisetsa sona. Ruri ke lumela ho bua ka leleme. Ke lumela e le neo ea Kereke. Kea lumela leleme le teng. Nkile ka bua ka liteme le 'na, hangata, ka bo-'na.

²⁵ Ha nke ke le etsetse mohlala, seo ke nahanang Pentekosta e ne e le sona. 'Me joale ke tla . . . ntho e kang eona, joale, kapa ea mokhalo ona. Ke ne ke etetse Dallas, Tex— . . . Houston, Texas, pele sets'oants'o sena se katlatsoa, tsatsi le leng. Re ka be re ile ra fumana Music Hall; re ne re ena le likete tse ka bang robeli. Batho ba sa khone ho kena, ka baka leo ra ea tabernakeleng ea Raymond Richey. Ke lebala feela . . . E le tabernakel lea tonana, e kholo. Le—le eona ra e tlatsa. 'Me ke ne ke rera ke rapella bakuli, mona. Eare, ba sa ba nts'etsa ntle, ke tlohe, ke rere ke ba rapelle mona, ha Raymond Richey, ka nqane ho noka.

²⁶ 'Me eare re sa le mono, re itokisetsa ho khutlela Music Hall. Ka . . . Howard a ntumeletse ho tsoella kamoo nka khonang. Eaba o nkama lehetleng, a mphathatsa lehlakoreng. [Moena Branham o a iphathatsa—Mong.]

Ha eba le hlokometse, ka phaposing, ha tlolo e fihlile, ba ee ba mphathatse, ka tsela *ena*. [Moena Branham o a iphathatsa—Mong.] Hoo ho bolela, "Ke nako ea ho khaotsa. U se hlole u bua. Tloo." 'Me Howard, o ne a tloaetse, ke ne ke ema mono, o ne a ts'oara letsoho la ka feela, a ntahle lehetleng la hae a ntoo tsoa. Le a bona? Hobane, a tsebile hore ke ne ke sebelitse ho lekana.

Che, ka qalella ho tloha kalaneng ha a ne a mphathatsa. Ka re, "Ho lokile, moena." Ka qalella ho tloha kalaneng, 'me ngoanana, ngoananyana, o ne a lutse, a eme mono, a lla. Ngoananyana, oa mo-Mexico, a ka ba leshome le metso e 'Meli, lilemo tse leshome le metso e mene, lilemong tseo tsa bocha. Eaba kea mo sheba, 'me ka re, "Molato ke'ng, moratuo?" Ka re, "O a lla, Howard, hobane . . ."

A re, "Ho lekane. U sa na le sehlopha se seng ka mane, se emeng."

'Me ka re, "Mo nyollele koano." 'Me ka ea mono, ka qhoaea ka tsela eo. 'Me a nyolohela kalaneng. Ke khlooa Moena Woods le batho ba bang ba ne ba le teng, joale. Ba ne ba le teng kopanong. Ha ke tsebe mohlang oo kapa che. Moena Woods, u hokase, bosiung boo? [Moena Woods o re, "Mona."—Mong.] O ne a . . . Na ke 'nete? ["Hantle."] Ee, u n'u le teng. 'Me ka re, "Mo tlise holimo mona kalaneng."

Che, ka re, "Sheba, moratuo. Ua lumela Molimo o khona ho mpolella seo bothata ba hao bo leng sona?" A 'na a kebisa hloho ea hae. "Che," ka nahana, "mohlomong ha a utloe 'Me o semumu."

²⁷ Ka baka leo, ka boela ka sheba. Ka bona hore e ne e le puo. Ka re, "Oh, ha a bue Senyesemane." A sa khone ho bua le lentsoe la Senyesemane. Ka hona a tsoa Mexico. Ka baka leo ba tlisa toloko. 'Me ka re, "U a lumela, moratuo, Morena Jesu a ka mpolella bothata ba hao?"

Che, a arabela a buisana le toloko, a re, "'E.' O ne a e lumela."

'Me ka re, "Ha u khone ho bua Senyesemane, ho hang?" Eaba toloko ea 'Molella.

A re, "Che." A sa tsebe le lentsoe la Senyesemane. A tsoa Mexico. 'Me ka baka leo ka . . .

²⁸ Eaba pono ea qala. Ka re . . . Pono ha ba e toloke, le a bona, hoba ha u phetse ho bua. Pono ha e ke e tolokoa, ka hona, pele e feta, ebe hona ba tla ba borella se hlahileng. Ka baka leo, joale, eare ha ke qala ho bua, ka bona pono. Ka re, "Ke bona ngoanana oa lilemo tse ka bang ts'elela. O apere mose o sekoche, lithapo tse nts'o tsa moriri li lepella mokokotlong oa hae, o kentsoe liribone. O lutse pel'a leifo la mehla ea khale. Ho na le ketlele e kholo, 'me o ntse a ja poone e ts'ehla ka hara eona. O ja poone e ngata hoo e bileng e mo kulisa. O oela fats'e, 'm'ae o mo robetsa moalang oa hae, 'me o ts'oaroa ke sethoathoa. 'Me ke sona se mo hlahetseng. O a bona?" Ka re, "E sa le u ts'oaroa ke sethoathoa, ho tloha mohlang oo."

'Me hang, le pele ho ka bua letho, a sheba toloko, a re, ka puo ea hae, "Ke itse ha a khone ho bua Sepanishe."

Eaba toloko e re, "Na u buile Sepanishe?"

Ka re, "Che, monghali. Ke buile Senyesemane."

A re, "Che, o re u buile Sepanishe."

Ka e ts'oara. Ka re, "Emisang lihatisi." Ho ena le lihatisi tse ngata tsa litonana, tse ka bang mashome a mararo li ntse li hatisa, mehleng eo.

Moena Roy Roberson, u n'u se teng moo? [Moena Roy Roberson o re, "E."—Mong.] E. Moena Roy Roberson, le Khaitseli Roberson le bao, ba ne ba le teng.

²⁹ Ka baka leo ka re, “Emisang lihatisi. Li khutlisetseng morao.” ’Me ruri e le ka Senyesemane. Empa, le a bona, eare ha ke qala...

Ha feels pono e ne e tsoella, ke ne ke bua Senyesemane empa o ne a nkutloa ka Sepanishe. “Ho ea ka’ng ha re utloa e mong le e mong ka puo ea rona, eo re tsoaletsoeng ho eona?” Le a bona? ’Me, empa, hang ha ke qala ke bua, ka bonna, a se ke a utloa letho leo ke le buileng. Empa ha feels pululo e ne e sebetsa...

³⁰ Joale le ka e lebahanya le Pentekosta, hang feels. U a bona? Motsoalle, Molimo ke moahloli oa ka. Moea o Halalelang o e entse. Joale re ka e lebahanya le morao koana Pentekosta, le seo re se bolelang. Moea o Halalelang o ke ke oa etsa ntho feels—feels hore e tle be O e entse. Eka khona ho be le morero le sepheo. Le a bona?

³¹ Joale, ka Letsatsi leo, “Ho ea ka’ng ha re utloa e mong le e mong oa rona, ka puo ea rona, eo re tsoaletsoeng ho eona? Na bana bohole, ba buang, ha se ba-Galelea?” Ba tsebile jwang hore e ne e le ba-Galilea, ha eba ba ne ba sa bue se-Galilea? Bohole ba ne ba apara ka ho ts’oana. Ba tsebile joang hore e ne e le ba-Galelea? “Na bana bohole, ba buang, ha se ba-Galelea na? Ho ea ka’ng ha re utloa e mong le e mong, ka puo ea rona, eo re tsoaletsoeng ho eona?”

³² Eaba, ho ema monna e mong, oa mo-Galelea, Petrose, a qala a ba rerela. ’Me ka mokhoa oa horeng, bongateng boo ba batho, meeaa e likete tse tharo ea mo utloisia, ea ba ea tla ea sokoloha, ’me ba nea Kreste mapheo a bona.

³³ Joale mamelang. Ha nke le fe Lengolo le leng hape, hle. Ha re eeng ho Mohalaleli e moholo Pauluse, ’me re tla bala khaolo ea 12 ea Bakorinthe ba Pele. Re nttoo theohela khaolong ea 13 ea Bakorinthe ba Pele, ha Pauluse a bua ka, “Tsebe leha e be e ka re ho nko, ‘Ha ke u hloke,’” ’Me le joalo-joalo, litho tsa ’Mele. Ebe khaolong ea 13—ea 13, le ka mamela seo a se boletseng joale.

³⁴ Joale, re tseba ho ena le mefuta e ’Meli ea lipuo tseo ho buuoang ka tsona Bibeleng. E ‘ngoe ke puo, mono ke—ke puo ea lefats’e. Joale, e ‘ngoe ke puo e sa tsejoeng.

³⁵ Joale, bongata ba batho beso ba ratehang... Ke le boleletse ke Mopentekosta. Joale, bongata ba batho beso ba lumela hoo, hore, ha ba amohela Moea o Halalelang, ba ema ’Me ba bua ka puo e sa tsejoeng. Taba eo e khahlano le Lengolo e tiile. Joale batho ha ba tsebe seo ba se buang. Empa, ka Letsatsi la Pentekosta, motho mang le mang o tsebile seo ba se buileng. E ne e le qaleho, ho ea le sechabeng ka seng. Le a bona? Jesu o itse, “Evangeli ena e ka khona e bolelloe lefats’e lohle, ho qala Jerusalema.” Ke hona moo e ne e tlamehile ho ba joalo.

Joale le elelloe. Pauluse o boletse, ho re, "Puo e 'ngoe, hore, ha o bua ka eona, puo e sa tsejoeng eo e leng neo ea lipuo, ha e sa fetoleloe kapa e sa tle ka ts'enolo, hore e ke ke ea thusa."

Re ntoo fumana, hore, khaolong ea 13, o itse, "Leha nka bua ka lipuo tsa batho," tseo ke lipuo tsa lefats'e, "kapa tsa Mangeloi. Leha nka bua ka lipuo tsa batho kapa tsa Mangeloi, 'me ke se na lerato, ha ke letho." Ka hona u ka bua ka lipuo tse makhonthe tsa batho le tsa Mangeloi, u nts'u o se na Moea o Halalelang.

³⁶ Na ha re qete ho e fumana, ho Baheberu 6? "Pula e nesetsa koro le mahola." Ana Jesu ha a re, "Pula e nela ba lokileng le ba khopo"? Le a bona? Eona pula e melisang koro, ke eona pula e—e melisang. Empa, ka tholoana ea eona, le tla e tseba.

'Me tholoana ea pele ea Moea ke lerato. Sona seo Pauluse a se buileng, "Ha nka rua—ha nka rua lintho tsohle, nka bua lipuo tsa mefuta, ha ke se na lerato, mamello, bonolo, tumelo, tiisetso, le joalo—joalo, ha ho nthuse letho." Le a bona?

³⁷ Joale le ntoo hlokomela ka lineo. U re, "Oh, ke eo monna e moholo oa Molimo. Oh, o etsa mehlolo." Hoo ha mo etse motho ea lokileng ka letho.

³⁸ "Leha nka ba le neo ea mehlolo," Pauluse o itsalo, ho Bakorinthe ba Pele, ntho e kang eo, "leha nka ba le tumelo hoo nka suthisang lithaba, ke se na litholoana tsa Moea, lerato, ha ke letho." Le a bona? Hobane, tumelo e ka etsa ntho e 'ngoe le e 'ngoe.

Ke ka baka leo kamehla ke reng, "Ha u folisoe ka baka la menyetla ea pholoso ea hao, mesebetsi ea hao. O folisoa ka menyetla ea tumelo ea hao, 'ha u lumela.'"

³⁹ Joale, le a bona, "Leha nka bua ka lipuo tsa batho le tsa Mangeloi, ke se na lera- . . . , leha a ka etsa hoo, "ha ke letho." Ka baka leo, u a bona, u ke ke ua bua letho.

⁴⁰ Joale, ho motsoalle oa ka ea khabane oa Methodise. Ke na le ba babeli ba lutseng mona, le hohle. Ke na le bona ka ntle mona, bongata ba bona. Pele kereke ea Methodise e ne e lumela, morao koana, qalong ea eona, ho re, "Ha motho a ena le borapeli bo lekaneng, 'me a hlatsoitsoe, ho hoeletsa, o ne a ena le Oona."

Pentekosta ea re, "Ha a bua ka lipuo, o ne a ena le Oona."

'Me mehleng ena, ba re, "Ha u na le ts'ebeletso ya pholiso, u na le Oona." Empa ha ho letho la . . .

⁴¹ Mamela, motsoalle. U se leke ho its'etleha le ho batla maikutlo. U ka mpa, ua its'etleha ka linnette, u a bona, e seng maikutlo. Ho hoeletsa ho lokile. Ho bua ka lipuo ho itoketse. Ho rorisa Morena ho itoketse. Tumelo ea mehlolo e lokile, lintho tseo tsohle.

⁴² Le maikutlo ao, ba bang ba re, “Oh, ke E tloile eka moea oa sefefo.” E mong o re, “Ke utloile Mollo sefubeng sa ka.” Eng? Hoo ha ho e lokise, ka lehlakoreng lefe. Ke seo u leng sona hoba u E amohele, u a bona, ke eona ntho e buang. U a bona? U ke ua e ts’etleha holim’a maikutlo a itseng.

⁴³ Joale, ke seo ke se tsebang ka bokhoni ba bots’ephei ba ka. Joale, mohlomong ke fositse; ha ke fositse, ke tla be ke sa utloisise Lengolo. ’Me ha e le khahlano, che, ha kea ikemisetsa ho ema khahlano. Le a bona? Ke mpa ke bua ka mohopolo oa ka oa seo ke lumelang e le ‘nete.

⁴⁴ Joale, re nkile boholo ba nako ea rona mona ka taba ena, pele re qala ts’ebuletso e tloaelehileng. ’Me joale—joale, ha re bue ka lintho tsena khafetsa tabernakeleng, ka linako tse ling. Ke khetlo la pele lena, kea khlooa, nakong e telele, mohlomong selemong kapa tse peli, kapa ntho e ‘ngoe. ’Me mohlomong ba bang ba batho ba rona ba kene, ’me ba re, “Ee, Moena Branham, ke—ke buile ka leleme le kokotletsang. Ke bile ke entse *sena*. Ke entse *sane*?”

Ebe ke re, “Ee, ho lokile. Ho hotle haholo.”

⁴⁵ Joale, ha u batla ho bua ka leleme le sa tsejoeng, ke lumela Molimo a tla u lumella. Empa ho latela Mangolo, u sa ntse u se letho pele Moea o Halalelang o fihla.

Joale, Moea o Halalelang ha u fihla, eba u ka bua ka lipuo ua ba le... Molimo o tla nka tlhaho ea hao, ’me a e tlose ho uena, ’me a u etse mohlanka ea khabane eo u ka bang eena. A ka u rerisa Evangel. A ka u fa neo ea ho bua ka lipuo. A ka u etsa moporofeta. A ka u fa moea oa boporofeta. A ka etsa joalo. Ho thata ho bolela, seo A tla u etsetsa sona. Kapa, A ka u etsetsa lintho tseo tsohle. Empa ntho ea pele, ke ho etsa bonnate, ho re, “Ka o le mong...” E seng maikutlo. “Empa ka Moea o le mong re kolobetsoa bohole ’Meleng o le mong.” ’Me joale lineo li tsoa ’Meleng oo, u a bona, ho bua ka lipuo le ntho e ‘ngoe le e ‘ngoe.

⁴⁶ Seo e leng sona, ha—ha Monazare a tla ho ‘na. U ka re, “Moena Branham, joale, ho na le Monazare le Momethodise. Ba re ba amohetse Moea o Halalelang ha ba ne ba hoeletsa. Ba boletse ba amohetse Moea o Halalelang.” Ha ke re ha ba o amohela.

Empa ke sheba ntho e le ‘ngoe ena, “Ka tholoana ea bona.”

Ha ‘Nete e senoloa, ba bang ba bona ba bua khahlano le Eona, hampe-mpe, “Ke Liabolosi.” Joale, tholoana e bonts’ a moo e tsoang teng. Le a bona? E supa ba sa O amohela. Empa bao ba ikemiselitseng ho tsamaea Leseling, ba amohela Lentsoe.

⁴⁷ Ha se khale mona, ha ke ntse ke rera Kentucky. ’Me ka ntle ho kopano, ho ena le monna oa kereke e lumelang ha matsatsi

a mehlolo a fetile. A ts'oere lebone letsohong la hae. 'Me a re, "Ke ne ke u emetse, moreri." 'Na le rangoane oa khale, ea seng a iketse joale.

'Me ka re, "Ee, monghali."

A re, "Ke sekete-kete."

'Me ka tsukutla letsoho la hae. Ka re, "Ruri ke thabetse ho kopana le uena, moena' ka."

'Me a re, "Ke batla ho u bolella feela hore ke lumela u fositse hampe-mpe."

Ka re, "Che, u na le tokelo ea ho etsa joalo, hoba u mo-Amerika." 'Me a re...Che, le a bona, 'me re na le...Ka re, "Ke fositse kae? Ana u bua ka pholiso ea khalalelo?" Ka re, "U reng ka ngoananyana eo ea n'a sa roala lieta maotong ea ileng a nyolohela mono maobane, bosiu ba maobane, a ts'oere lesea?"

A batla a se le lilemo tse leshome le metso e mehlano, ka bo-eena, a sa roala lieta maotong. Ntho ea khale...Le e bitsang? Gingham, calico, kapa mose oa mofuta. Ha ke tsebe lintho tseo. 'Me—'me a nkile lesea letsohong la hae, a atamela ho 'na. 'Me batho ba hlahile fese-... 'Me ena e ne e le kereke ea Methodise, kereke ea White Hill Methodist, a tsoa Burkesville, Kentucky, moo ke hlahetseng teng. 'Me a nkile lesea la hae. 'Me ka re, "Khaitseli..."

Ka botsa, "Ho na le motho ea kulang?"

A ntoo tsamaea a nyoloha mono, mothoana, ea batlang a le lihlong-nyana, a inamisitse hlohoana ea hae. 'Me a re, "E, monghali, lesea la ka." 'Me mothoana eo a nts'a etsa joalo.

Ka re, "Molato ke'ng ka lona, khaitseli?"

A re, "O a rutleha."

'Me ka re, "Ho rutleha?"

"E, monghali."

Ka re, "Ho rutleha hoo ho mo ts'oere nako e kae?"

'Me a re, "Che, ha e sa le a tsoaloa, 'me joale o atamela selemo."

Eaba ke re, "Na u ntumella ho nka lesea leo?" Holimo koana lithabeng motho u tlamehile ho hlokomela ntho eo.

Eaba o re, "E, monghali." A bea thakanyana leo sephakeng sa ka.

⁴⁸ Pelong ea ka, ka ema tsi, motsotso. Ka re, "Molimo, ha U mpatlha ho hapa batho bana, nketsetse ntho hona joale."

'Me eare ke sa le ts'oere ka letsoho la ka, la emisa ho thefuleha. Ka le sheba. Ka le tsepamisa, liphakeng, ka le bapalisa, la bobotheha la nts'ehisa. Ka sheba mosali. 'Me a ema...O ne a inamisitse hloho ea hae, moriri o phasaletse

mokokotlong oa hae, o lohuoe lithapo. A phahamisa hloho ea hae, le likeleli li ts'oloha marameng a hae a manyenyane. Banna ba linatla ba eme mono, ba le litetu fahlehong tsa bona, li le *kaalo*, 'me likeleli li ts'oloha marameng a bona. Ka thalatsa. Ka re, "Lesea la hao ke lena, khaitseli. Jesu Kreste o a le folisa" 'Me basali ba holileng bao ba qalella ho akheha ba oela fats'e, ba ba hasa ka metsi fahlehong tsa bona, ba ba fokela moea.

'Me—'me, khele, ka re, "Hoo ho entsoe ke'ng?"

A re, "Moena Branham, ha ke amohele letho pele ke le bona ka ho hlaka."

Ka re, "Che, ke mohopolo o motle, kea kholoa. Empa," ka re, "Ke batla ho u botsa, u lula kae?"

A re, "Ka morao ka nqane ho thaba mona, hole. U ka 'na ua ea hae ua ja sophoro le 'na bosiung bona, ke tla u fa serelei le bohobe ba koro."

Ka re, "Ke rata ho ea, ke hlile ke lapile, empa," ka re, "Nke ke ka khona. Ke tlamehile ho ea hae le malome." 'Me a... Ho re, "Be, ke batla ho u botsa. Ke batla ho u botsa ntho e 'ngoe. U tseba joang hore u tla fihla hae?"

A re, "Che, ke tla tsamaea ke hloe thaba."

Ka re, "Na u bona ha hao?"

A re, "Che."

Ka re, "Joale u tseba ka'ng u tla fihla mono?"

A re, "Ho na le tsela e eang teng."

Ka re, "Empa, leha ho le joalo, u ntse u sa le bone. 'Me u sa tsoa mpolella ha u sa amohele letho ha u sa le bone, ka ho hlaka."

"Oho," a re, "Ke tla ts'oara lebone ke tsamaee ka leseli."

Ka re, "Ke sona seo ke lekang hore u se etse."

Joalo ka ha lebone le bonesa, u tsamaee Leseling joalo kaha A le Leseling. Re tla fihla mono hantle. Leha ke sa bone pheletso, ka ho hlaka, empa kea tseba e tla fihla mono.

Ha re rapeleng joale.

⁴⁹ Ntate ea Maholimong, re U leboha ka mosa oa Jesu Kreste, Eena setsi sa lerato. Ke ne ke ee ke nahane ha U nkhalefetse, empa Jesu eena a ne a nthata. Empa ke fumana joale hobane Jesu ke pelo ea Molimo ka sebele, ka baka leo ke—kea tseba U a nthata u bile—u bile ua utloa bohloko ka baka la ka.

⁵⁰ 'Me, Ntate, Molimo, ke rapella lefats'e lena kajeno, le naha ea rona. Ke rapella, ts'oarelo ea liphoso tsa ka le liphoso tsa batho ba heso, Morena, batho bao U mpeileng ho ba alosa. 'Me ke rapela hore U tle u ba hlhonolofatse, le e mong le e mong oa batho ba neng ba le ka har'a kopano e nyenyane ena, ea

botsitseng lipotso. Kapa—kapa, mohlomong ke buile ntho e khahlano le seo ba se lumelang. Morena, ha ke khone ho e hhalosa, ka bona. Kea sitoa. Empa e re...Na U tla ba tsebisa, Ntate, ka pelong ea ka, seo ke se bolelang? Ka kopo hle. Ke U kopa ho etsa joalo. Ba hlohonolofatse, hammoho.

⁵¹ Re hlohonolofatse re sa emetse Lentsoe la Hao, metsotso e 'Maloa feela pele ho ts'ebeletso ea kolobetso. Re thusese ho bua se lokileng. Re thusese, ka Molaetsa ona bosiung bona, 'metso oa ka o batla o hoaea-hoaea. Ke U kopa ho nthusa, Molimo o ratehang, 'me U bile u tla folisa ba kulang le ba hlomohileng ba har'a batho. Hoba re e kopa ka Lebitso la Jesu. Amen.

⁵² Joale, ha le rata, metsotso e 'Maloa e latelang, ha re phetleng Bukeng ea Baroma, khaolo ea 6.

Oh, butleng. Kea kholoa ke ts'oere...Be, ke ts'oere tse ling lipo...Be, tsena ke tla li araba Laboraro bosiu. Ke felile, nako e ile haholo joale. Ke ne ke ntse ke sa hlokomele tse robetseng mono haese hona joale.

Joale, Baroma khaolo ea 6, ha re baleng.

Joale re tla re'ng? Hleka re tla hlola sebeng, hore mohau o tle o ngatafale na?

Molimo ho se ke ha ba joalo. Ana rona ba shoeleng ka nga ea sebe, re ka 'na ra phelela joang ho sona?

Ana ha le tsebe, hobane rona joalo ka...ba kolobeletsoeng ho Jesu Kreste re kolobeletsoe lefung la hae?

Ka baka leo re ile ra patoa le eena ka ho kolobeletsoa lefung: hore joalo ka ha Kreste a tsositsoe bafung ke khanya ea Ntat'ae, ka mokhoa o joalo le rona re tsamaee ka bophelo bo bocha.

Hobane ekare ha re entsoe setlama se le seng le eena ka ho ts'oana le eena lefung la hae, re tla ba joalo le tsohong ea hae.

⁵³ Ha nka qotsa sehloho bosiung bona, metsotso e ka bang mashome a mabeli, nka bua sena, "boitsebiso," *Ho Etsoa Setlama Le Kreste*.

⁵⁴ Le a tseba, kajeno, ho na le batho ba bangata hakana naheng, ba sa khotosfalang. 'Me ho a makatsa, ha u fumana ho hloka khotosfalo ho ho ngata hakana ka mathoko. Batho ba batla ba sa tsebe seo ba batlang ho se etsa. Ba theoha tseleng ka limaele tse ka bang mashome a supileng kapa a robeli ka hora, ngalong ea mashome a mararo; ba theolla mariki ba potela ka khona, 'me ba tloseletse ka lebelo le le kaalo ba be ba chese lithaere tsa bona, ho ea mohahong o mong, ho ea lula fats'e le ho qoqa nakoana. Eka batho ha ba tsebe seo ba batlang ho se etsa.

⁵⁵ Ba bang ba bona ba ferekane hoo ba eang khemiseng ba ithekele botlolo ea aseniki, soda kapa ntho e 'ngoe, 'me ba ipolaae. Ba ba fumane ba robetse ba shoele. Ba bang ba bulele libotlolo tsa gase ea bona ka phaposing, kapa ba lule ka har'a makoloi ka phaepe ea gase ea khaboumonokosaede, ba leka ho sutha bophelong. Ba bang ba bona ba hloelle borogong, ba ngole lengolonyana ba le qhoaele baking ea bona, ba le bee fats'e, ba itihela lithabeng, litoreng tse telele. 'Me ba bang ba nke bistolo ba e bee hlohong ea bona, ba be ba pshatle boko ba bona bo hasane. Ba mpa ba sa khotsofala feels.

⁵⁶ Likokelo li tletse batho ba sa khotsofala. Litulo tsa batho ba sa itekanelang lia phophoma. Ho se khotsofale! Ha ba tsebe seo ba se batlang. Eka ho na le ntho eo ba e seohelang, ba mpa ba sa e fihlele.

⁵⁷ 'Me hape re fumana, malapa, e leng mokokotlo oa sechaba le—le oa kereke, re fumana malapa a pshatlehile, 'me makhotla a hhalano a phophoma lihhalano. Ho fetella ha bana, ka—ka bo'me ba sieang bana ba bona le basebeletsi 'Me—'me ba tloha, ba ea ka ntle ho sebetsa kae-kae, holim'a banna ba bona ba fumane mosebetsi o motle, empa ha ba khotsofalla ho ba 'Me le ho lula hae. Ha ba khotsofalla ho apara joalo ka mafumahali. Ba—ba batla ho apara joalo ka banna. Banna ba batla ho ts'oana le basali. 'Me ba mpa feelsa... Ho bonahala ho ena le ntho e phoso, kae-kae. 'Me batho ba seohela ntho e 'ngoe, 'me ha ba e fumane. Ke maemo a haulang ho kena ho oona.

⁵⁸ Ba batlile hohle, ho fumana ntho e 'ngoe, ho iketsetsa mohlala. Re nka basali ba letsatsi la rona, ba tla sheba thelebishene ba be ba fumane khalala ea sebapali. Kapa, o ee a tsoe, a apere ka tsela e itseng, 'me basali bohole ba tla batla ho apara joalo ka eena, kapa ho its'oara joalo ka eena, ho mo etsa mohlala oa hae. Banana ba bang ba batle, paleseng ea bocha feelsa, ba tla leka ho its'oants'a, ba leke ho etsa khalala e itseng mohlala oo ba lokelang ho o latela. 'Me ba qetelle ba sohlotmetse letsabeng la sebe leo ba sitoang ho tsoa ho lona. Ho haula hakakang! Ho ba bona ba kena kopanong, likeleli li matha mahlong a bona, empa ba tsoma ntho e 'ngoe.

⁵⁹ Re nka banna. Banna, u ba khaoletsa seterateng kapa likhoebung tsa bona. Monnamoholo o batla ho ba moshanyana. O tla kuta moriri oa hae, flat-top, 'me a o bope mohatla oa letata ka sekotlong. O batla ho ba moshanyana. Ngoana o batla ho ts'oana le e mong oa marena ana a rokon-rolo. Ba fella kae? Sebeng le lihlonng.

⁶⁰ Monna o shebahala a sa khotsofala. O matha hohle. Ba ee ba nke, ba mamele seea-le-moea, metlae le lintho tseo borametlae ba li buang. 'Me ba tla tsoa ba leke ho qopitsa kapa—kapa ho etsisa batho bao.

⁶¹ U ka nka moshanyana seterateng. Ka moo ke tsebang kateng! 'Me o tlamehile ho ba Paladin, kapa Hopalong Cassidy. Kapa... 'Me lefats'e la papatso le nka ntho eo le etse limilione tsa lidolara ka eona. Ba tlamehile ho ba Roy Rogers, kapa e—e Mongh. Dillion, kapa—kapa lekoko le itseng la lenaneo la thelebishene.

Ba leka ho etsisa motho eo. Ba ba bea e le mohlala. Ba ba beile e le sekala sa bona—sa bona sa bophelo. 'Me pheletsong ea tsela ba fumana'ng? Bathoana bao ba fetoha linokoane le batlatlapi. Basali ba fetoha liotsoa, 'me—'me ba tsamaea seterateng, le—le batho ba feteteletseng. Banna ba fetoha magembolara, le, "Ba ratang menate ho feta Molimo." Likereke li leka ho etsisa kereke e 'ngoe, kereke e kholo.

⁶² Ekare rea bona, khotsofalo ha e eo har'a batho. Ba etsa'ng...

Ba etsoa ke'ng joalo? Ho na le lebaka. Ke tlahao. Molimo o ba file tlahao eo. Ba na le tlahao e ba batlisang seo ba ikamanyang le sona. Ba ts'oanetse ho fumana ntho eo ba batlang ho ts'oana le eona, morero bophelong.

Ba batla ho ba khalala ea lits'oants'o, kapa lekhauboi, kapa—kapa ntho ea mokhalo oo.

⁶³ Ke ne ke mameitsee seea-le-moea, ke ea hae, moo monna e mong e moholo oa Motaliana, mane Denver, a na a leka ho bapala Hopalong Cassidy, ntho e 'ngoe, ka sethunya se hlahletsoeng. 'Me sebakeng sa hoo, o batla ho ba Chester, bophelo bohole ba hae. O ile a thunya theleli ea hae a e tlosa. Ke moo he.

⁶⁴ Empa ba leka ho fumana ntho eo ba ka iketsang setlama le eona. Lebaka leo ba e etsang, ke kahoba ho ena le ntho e 'ngoe ka ho bona. 'Me Molimo o ba etselitse eona.

Empa Molimo o ba beetse mohlala oa ho itlamanya, 'me ke mohla A ne a etsa Jesu Kreste Mopholosi oa hao. Ke oona mohlala. Ke seo batho ba se batlang, ba tlamehile ho labalabela ho etsoa setlama se le seng le Jesu, ho ts'oana le Eena.

⁶⁵ Hola bashanyana bohole ba batlang ho ba Hopalong Cassidy kapa—kapa e monng oa bana ba bang; kapa banana, bo-Annie Oakley le joalo-joalo; hola ba batlile ho ts'oana le Jesu, hakaalo ka ha ba batla ho ts'oana le ntho eo, likolo tsa Sontaha li ka be li phophoma, hohle. Hola basali ba batlang ho ts'oana le khalala ea lits'oants'o, ba ka batla ho ts'oana le Jesu; kereke, khele, ba ne ba sa tlo tlameha ho phutha monehelo. Ruri.

⁶⁶ Molimo o kentse ho motho ho lakatsa ho fumana mohlala. 'Me Molimo o mo beetse mohlala. Mohlala oo ke Jesu Kreste, ho etsoa setlama le Eena.

⁶⁷ Joale, hola re ne re ka ts'oana le Eena ho feta, ho ne ho sa tlo ba le limelala tse ngata hakana lefats'eng. Ho ne ho sa tlo

ba le bana ba lapang lefats'eng. Ho ne ho sa tlo ba le wiski, kapa seno, kapa ho gembola. Molimo o re beetse mohlala oa ho ts'oants'isa, empa ha re batle ho fetoha Oona. Joale, ke bona bothata ba lefats'e. Ba na le takatso, Molimo o ba file eona, empa ba e lebisitse nthong e phoso. Ke nako ea ho khutla le ho kena tseleng e nepahetseng, le ho toba Kalvari. Tlhaho e paka hoo.

⁶⁸ Joale, hola batho ba letsatsi lena, ka takatso e kholo eo le ka tabatabelo e kholo eo ea ho ts'oana le motho e mong, e le mohlala. Hola ba ne ba beile Kreste e le mohlala oa bona, joale re ne re tla ba le . . . Re ne re tla nyaola leponesa ka leng le leng teng, sechabeng. Motho e mong le e mong o ne a tla ba mosa a ikokobetse. Motho ka mong o na a tla ba bonolo a be le lerato ho bohole, ba ratane. Ho ne ho sa tlo ngolisoa nyoea ea hlalano naheng ea rona. Ho ne ho sa tlo ba le boloetse. Esita le likokelo re ne re tla li ts'olla, hola motho ka mong a ne a lekile ho etsa Jesu Kreste mohlala oa hae. Re ne re sa tlo hloka letho.

⁶⁹ Ka baka leo, tlhaho eo e ka har'a motho, empa o e bea nthong e phoso. O etsa monna ea itseng . . . 'Me lea tseba, Bibele e boletse, ho re, "Ha re ts'epa nama ea rona re rohakiloe. Ha u leka ho ts'epa nama ea hao, kapa ho ts'epela nameng ea hao," Bibele e itse, "u rohakiloe."

Ke tseba hantle hakakang! Ho bonolo ho e etsa.

⁷⁰ Boholo ba eona bo bakoa ke hona, ke matlapa a rona a litaba a tletseng limakasine tse manyala; malapa a rona a qhoaetsoe lits'oants'o. Litaba tsa rona ha lia sefshoa; li bulehile, ba ka etsa motlae oa mofuta o mong le o mong, kapa—kapa ba etsa lintho tse ts'abehang. Bohloeki har'a rona, ha bo sa le eo. Kea tseba le nahana ha ke le thata haholo tabeng eo. Empa ke . . . Motho e mong o tlamehile ho ba thata ka eona. E tlamehile ho etsoa.

⁷¹ Ha ke sa le moshanyana, ke ne ke bala buka ea *Tarzan, The Apes*. 'Me o ne a ena le phate ea boea e lohiloeng eo Mof. Wathen a na a mo file eona, e robalitsoe ka pel'a seipone sa ho aparelha. Ke ile ka e kheketla ka iketsetsa sutu ea Tarzan, 'me ka robala veke sefateng. Ke batla ho ba Tarzan. Eare ha ke bala buka *The Lone Star Ranger*, ka kalla molangoana oa lefielo ka ntle, e le pere ea ka, ke leka ho ba Lone Star Ranger.

⁷² Le joalo batho ba etsa ntho eo. Ke seo u se balang, 'mino oo u mamelang.

Ha u kena reshurenteng, ka rokon-rolo ena ea khale, ha ho makatse ha batho ba hlanya. Hoo ho lekane ho fapanya motho hloho.

⁷³ Empa, oh, ke tla leboha, Bosafeleng bohole, ka tsatsi le leng ha ke ne ke bala ka Jesu. Hoo ha nkhotsofatsa. Ke batla ho ts'oana le Eena. Ke tabatabelo ea ka, ho ba le bokhoni ba ho

sokolla lerama le leng, kapa ho tsamaea maele o mong oa bobeli. Ho ba le bokhoni ba ho ts'oarela, ha lintho li le khahlano le uena, u se na letho khahlano le motho. Leha ba ka u etsa hampe ka nepo, kapa hampe ka ho etsa ho lokileng, empa u 'n'u ba rate. Ke batla ho ba joalo. Ke batla ho ba motho ea joalo. Ke batla ho ba le bokhoni, hore, ha ke halefisoa, ke se ke ka bopa. Ke mohlala oo Molimo a re fileng oona ho Jesu Kreste. Re tlamehile ho etsoa setlama le Eena. Rona ee.

⁷⁴ “U etsoa setlama le Eena joang,” u ka rialo, “Moena Branham? Joale, ho fumana... Motha o lokela ho apara joalo ka likhalala tsa Hollywood ho etsa lintho tsena tse ling. Empa u etsoa setlama joang le Jesu Kreste?”

Pele, u bakel seo u kileng ua se etsa. U ntso etsoa setlama le Eena, ka har'a lets'a mona. Ntle le pelaelo ba bangata ba tla etsoa setlama le Eena, metsotsong e 'maloa. Ka har'a lets'a, u etsoa setlama le Eena kolobetsong. “Hoba ha re fela re patiloe ka ho Kreste, re etsoa setlama se le seng lefung la Hae, kepelong, le tsohong.” Re kolobeletsoa hona. Re theohela metsing, re khutla re le lipaki tsa ha re lumela lefung, kepelong, le tsohong ea Jesu Kreste. ’Me ha re fela re jaloa ka sets'oants'o sa Hae, lefung la Hae, Molimo o re etselitse ts'episo: re tla ts'oana le Eena, tsohong.

Ak'u iketse setlama le khalala e itseng ea lits'oants'o, 'me u bone moo u tla fell teng. Ak'u iketse setlama le lekhauboi, kapa moshanyana ea itseng, 'me u bone moo u tla fell teng.

Empa kea u phephetsa, bosiung bona, ho iketsa setlama le Jesu Kreste, lefung la Hae, tsohong ea Hae, 'me u shebe moo u tla ema teng tsohong. “Hoba ha re fela re utloa bohloko le Eena, re tla busa le Eena.” Molimo o re file ts'episo. Takatso ea ka eohle ke ho ts'oana le Eena.

Nkuke, oho Morena, nchete u b'u mpope. Ntokise bocha. Joalo ka moporofeta ea kileng a ea ha 'Mopi oa lipitsa, nthuhe u boele u nchete.

⁷⁶ Ka Testamenteng ea Khale, ha motho a ne a batla ho amants'oa le ntlo ea Molimo, o ne a nka ntho e hlokang sekoli ka ho fetisisa a n'a ka e fumana, konyana. 'Me o ne a tseba konyana e se na sebe, hoba e ne e sa tsebe sebe. 'Me a tlohe, a ts'oare konyana, a bee matsoho a hae hlohong ea eona, a ipolele libe tsa hae. 'Me ka tumelo, a fetisetse libe tsa hae ho konyana, le ho hloka sekoli ha konyana ho eena. 'Me konyana e shoe, hoba e ne e le moetsalibe. 'Me motho a phele, ka ketso ea tumelo, ea ho lumela se boletsoeng ke Molimo. Empa o ne a etsa'ng? A boele a tsoe tempeleng, ka takatso ea keneng ka eona. Hobane, ha sele eo ea mali e taboloa... Etsoe, bophelo bo qala ka har'a sele e le 'ngoe ea mali. 'Me enere ha sele eo ea mali e taboloa, bophelo ba konyana bo ne bo sa hokahane, kapa ho boela bo kena bophelong ba motho, hoba e ne e le

bophelo ba phoofolo. Motho o ne a tsoa ka takatso ea keneng ka eona, ka baka leo a sa phetse ho etsa libe, ka linako tsohle, hape.

⁷⁷ Empa ha fihla mohla Molimo a n'a re beela mohlala, 'me A re fa Morena Jesu. 'Me ha moetsalibe a bea matsoho a hae hlohong ea Hae e theko e thata, 'me a ipolela libe, 'me libe tsa hae lia fetoloa kapa—kapa li fetisoa ho tloha ho moetsalibe ho ea ho Jesu; 'me ho hloka molato ha Jesu ho fetisetsoa, ka Moea o Halalelang, ho motho eo. "Ke 'Mopua e mocha ho Kreste Jesu." Ke hona moo ke batlang ho etsoa setlama se le seng. Bibele e itse, "Eena, ea sa kang a tseba sebe, o entsoe sebe ka baka la rona." Ke ka baka la sebe sa rona A ileng a utloa bohloko. 'Me ha se ts'oanelo, ha se tokelo ea rona, ho sheba lintho tsena le ho bona hobane litakatso tsena tseo re nang le tsona, Molimo o li kentse ka ho rona, ho bopa ka ho rona, ho re etsa re batle ho ts'oana le Eena.

⁷⁸ 'Me joale, ha le ka e bona, ka tumelo, le pele takatso ea 'nete e u fihlela, tloo kapele, u etsoe setlama se le seng le Eena ka kolobetso. 'Me ha u fela u jaloa ka sets'oants'o sa lefu la Hae, ka mokhoa o ts'oanang u fela u tla ba le kabelo ho Eena, tsohong. Hoba ha A tsoa lebitleng, e ne e le Eena Jesu ea keneng lebitleng. "Mme ha re le ka ho Kreste..." Re kena joang? Ka kolobetso ea Moea o Halalelang. "Mohlang oo re tla tsoa re be le kabelo tsohong ea Hae."

Ke ne ke ee ke bine thoko e 'ngoe, lilemo tse ngata tse fetileng.

Ho ts'oana le Jesu, ho ts'oana le Jesu,
Lefats'eng ke batla ho ts'oana le Eena;
Leetong la bophelo, ho tloha 'fats'eng ho ea
Khanyeng,
Ke kopa feela ho ts'oana le Eena.

Sejelong sa Bethlehem ha tsoa Moeti, (Moeti,
ho lefats'e)
Lefats'eng ke kopa ho ts'oana le Eena;
Leetong la bophelo, ho tloha 'fats'eng ho ea
Khanyeng,
Ke kopa feela ho ts'oana le Eena.

⁷⁹ Ho arola bonolo ba Hae, le tla arola matla a Hae. Ho arola kutlo ea Hae, 'me le tla arola tsoho ea Hae. Ho etsa kamoo Molimo a itseng ho etsoe. Pelong ea ka, ntho e kholohali eo nka e nahanang, ke ho ts'oana le Jesu Kreste, ho amants'oa le Eena. Ke lona lebaka ke kolobetsang batho ka Lebitso la Jesu Kreste, hoba Eena e le boitsebiso ba rona. Re jere boitsebiso. "Tsohle tseo le li etsang ka ho bua kapa ka ho sebetsa, le li etse ka Lebitso la Jesu Kreste, le ntse le rorisa Molimo ka baka la eona." 'Me re amants'oa le Eena kolobetsong.

⁸⁰ Bosiung bona, re tlil'o kolobetsa, metsotsong e 'Maloa feela, batho ka phaposing ka mona, ba mona ho kolobetsoa.

'Me takatso ha e le teng pelong ea hao, u e batlang, u ena le sepheo sefe feela se seholo sa lefats'e, u se bakele hona joale. Bolella Molimo u masoabi ha u ne u batlile ho ba mothohali ea itseng oa lefats'e. [Sekheo lebanteng—Mong.] Ho re, "Morena, sepheo sa ka se feletseng ke ho ts'oana le Jesu." Tloo ka bonolo, ka boikokobetso, joale, ha u bea matsoho a hao Hlohong ea Hae, 'me ka tumelo u bolele sebe sa hao. Ho re, "Morena, ke masoabi ha ke entse hoo." Joale ho tla etsahala'ng? Molimo o tla fetisetsa molato ohle oa hao ho Eena, le ho nka phetheho ea Hae a e bee holim'a hao. 'Me u ema u lokafetse, ka pel'a Sefahleho sa Molimo, hoba u lumetse ho Jesu Kreste, Mora oa Hae. Ke morero o mokakang oa pholoh! Joale u tla arola khanya ea Hae. Ho loka ha Molimo ho tla kena pelong ea hao. Matla a tsoho ea Hae a tla u etsa motho e mocha. A tla khotsofatsa tabatabelo ka 'ngoe.

⁸¹ Ha ke sa le moshanyana, ke ne ke leka ho etsa ntho e 'ngoe le e 'ngoe. Ka—ka etsa sohle seo ke ne ke holile ho se etsa. 'Me lintho tse ngata tseo ke ne ke se moholo haholo ho li etsa, ka leka. Ke ne ke rata, ke sa ntse ke rata, ho tsoma. Ka hopola e le eona ntho. Ka nahana ka eona. Ntate e ne e le mokalli. Ka nahana, "Ha nka fihla Bophirima 'Me ka thapisa lipere tsa bona!"

Empa, moena, ka tsatsi le leng morao koana lithabeng tsa Arizona, ha ke theola mohlape oa makhom, bosiung bo bong. Ke ne ke lutse mono. 'Me moshanyana ea bitsoang Slim o ne a ena le kama ea khale, a e thatetse ka pampiri. O ne a bapala. Thaka le leng le lutse mono, le tsoa Texas, le nkile katara, le tlhoronya. Eaba ba bina sefela. Ke ne ke hlohlolotse sale pereng; ke robalitse hloho ea ka, ke e entse mosamo. 'Me kobo ea ka e nkapesitse, 'me ke le mono, ke ntse ke roetse libuts'u tsa ka, para ea lits'epo tse peli tse hlohlotsang e mphahamisitse fats'e. 'Me a qalella ho lets.

Sefapanong moo Moloki a shoang,
Teng ka llela hlatsuo ea sebe sa ka;
Teng Mali a tlotsoa pelong ea ka;
Ho bokoe 'Bitso la Hae!

⁸² Ka leka ho hula kobo, ho koala litsebe tsa ka. Ka sheba holimo, 'me linaleli li ne li leketlile haufi. 'Me liphaene tse sebang har'a lithaba eka li hoeletsa li re, "Adama, u ho kae?"

Khele, ho aloisa makhom e ne e le ntho ea bobeli. Ke ne ke batla ho fumana Molimo. Morao koana, ka khitla fats'e ka metsu e hlohlotsang eo, ka re, "Monghali, ha ke U tsebe, empa u se ke ua nkahlola pele ke fumana ntho ea 'nete."

⁸³ Matsatsi a mabeli ka morao moo, tlase motseng, ke ne ke lutse mono, e le matsatsi a 'Maloa ka morao ho moo, hoba ho bokelloe makhom. Ke ne ke lutse mono setulong sa khale sa ts'ingoana. Ngoananyana oa mo-Sepanishe a feta. 'Me ke lutse

mono, ke nahanne ka Molimo, “E be Ke eng?” Ngoanana, e monyenyanane a feta, ‘me ‘na ke le moshanyana oa lilemo tse leshome le metso e robeli. A liha sakatuku ea hae a feta. Ka re, “Mosali, o lihile sakatuku ea hao.” Mohopolo oa Molimo feela o ne o fetotse takatso ea ka. [Moena Branham o kokota hane sefaleng—Mong.] Pelo ea ka ea mo-Irishi e ne e lapile. Ke ne ke batla ntho e ‘ngoe, ntho e ‘ngoe e khotsofatsang.

⁸⁴ Molimo o mphile monyetla oa ho tsoma, lefats’ e ho pota, Afrika, India, lithabeng, Canada, mats’olong a mang a maholo, ‘me ka etsa lirekoto. Ho itoketse. Empa ha ho letho le tla tlatsa sebaka sa Matla ao a Molimo o phelang, ho A romela moeeng oa hao.

⁸⁵ Ha ke fihla mono, ke rata lithaba. Ke rata matsatsi a likelang. Ke ee ke hlome feela—feelaa, ke holehe pere ea ka. ‘Me ke nyolohole, holim’ a lithaba, ‘me ke qete matsatsi a ’Maloa, ke shebile feela letsatsi le chabang le le likelang, ke utloa ntsu e llang. Ho monate. Ke rata ho lula mono. Empa, moena, pelo ea ka e qalella ho uba le ho otla, ha ke nahana ka:

Ha kea hloeka, ha kea hloeka, meeaa e mebe ea
mo tuba.

Tsohle li lokile ha Jesu a fihla.

Ka qala ho hopola batho ba kulang, le sello seo. ‘Me ho na le ntho ka ho ‘na, e hoeletsang, “Tsoa lithabeng tsena kapele. U theohele mono bathong.”

Ke batla ho iponts’ a ke le mohlanka oa Hae har’ a batho ba Hae. Oh, kamoo ke ratang ho iponahatsa le Eena. Joale, ka baka leo, O boela a khutlela har’ a rona le ho Iponts’ a le rona. O mona bosiung bona, motoalle.

⁸⁶ Ke nako ea ts’ebelsetso ea kolobetso ho qala, metsotsong e ka bang leshome. ‘Me ke batla ntho e le ‘ngoe ena pele re e etsa, pele re e qala. Jesu Kreste Mora oa Molimo... Ho na le litlhahiso tse ngata tseo ke batlang ho li bua, empa ha ke na nako.

Jesu Kreste, Mora oa Molimo, o Iponts’itse Lentsoeng la Hae. Jesu Kreste, Mora oa Molimo, o Iponats’itse ka hara kopano hoseng hona, ka ho senola mehopolo. Ho Iponts’ a ka ho nts’ a moetsalibe mafoomeng a sebe, ho mo etsa monna e mocha, ‘mopua e mocha. Ho nka mosali ea nyehlileng ka ho fetisia kapa monna ea nyehlileng ka ho fetisia, letaoa, lekhoba la tahi, le seo e ka bang sona, a ba tsepamise a ba hloekise, ho ba etsa monna ea khabane kapa mofumahali. Ke Morena oa ka eo. Ho nka monna ea kulang le ea hlomohileng, ts’epo e le sieo ho eena, ‘me a mo tsosetse bophelong bo bocha hape. A ntoo bonahala har’ a rona, a Iponts’ a e le eena Jesu eo, ka ho tseba mehopolo ea pelo tsa rona. Ho ema har’ a rona, ka har’ a batho ba Hae, Molimo ka har’ a batho ba Hae, a Iponahatsa. O mona hona joale, oona Moea o Halalelang oo.

⁸⁷ Pele re qala kopano eo ea kolobetso ka mona, baena ba sa lokisa, ke ipotsa sena. Kea ipotsa ho na le ea sa rapelloang ka mona, hoseng hona, 'me u a kula. Ha re bone letsoho la hao le phahama. Phahamisa matsoho a hao ha u kula u bile u hloka, 'me u sa rapelloa, hoseng hona. Ha ho karete ea thapelo kapa letho; haese—haese ho kula le ho hlomoha. Ke hantle.

Ha re inamiseng lihloho tsa rona nakoana feela.

⁸⁸ Morena, ka 'Metso ona o patahaneng, lentsoe le makherehla, oh, ke U rapela ho kenya pelong, Peo, leha ho le joalo, pelong tsa batho, re tle re etsoe setlama le Uena. Hoba, ho na le maele a khale lefats'eng mona, "Nonyana e tsebjoa ka masiba a eona, 'me motho eena o tsebjoa ka ba lesaka la hae." 'Me, Ntate ea ratehang oa Leholimo, re U rapela ho tsamaea le rona. Morena, re ke re fumane Uena, leha ho ka re qosa leruo la rona lohle lefats'eng lena. Re ke re etsoe setlama se le seng, joalo ka, "Ruri motho eo o phelela Molimo. O tsamaea le Molimo."

⁸⁹ Ho ke ho buuoe joalo ka Petrose le Johanne, hoba ba fete monyako o reiloeng o Lokileng, 'me ha thoe, "Ha ke na chelete; empa seo ke nang le sona, ke u fa sona." 'Me ha folisoa monna oa seritsa. 'Me mohla ba ne ba eme ka pel'a makhotla, batho ba re ba lemoibile e ne e le batho ba sa rutehang ba sa balang. Ba se na thuto, empa ba lemoha hobane ba tsamaile le mokhatlo o nepahetseng. Ba ne ba tsamaile le Jesu. Molimo, ke takatso ea pelo ea ka eo, ho etsoa setlama se le seng le Uena, joale ka e mong oa bahlanka ba Hao, joalo ka ea U ratang, ea tla ts'epahala ho Uena, le ho boloka lipolelo tsa Buka ea Hao, le ho etsa tsohle tseo ke tsebang ho li etsa, tse lokileng.

⁹⁰ Joale, Ntate, ana U tla Iponahatса har'a rona hape bosius bona, batho ba tle ba tsebe haese ntho feela, oh, nakoana e ikhethang, kapa—kapa ntho e kang eo, Morena. Ho ke ho tsebjoe bosius bona hore U sa le eena Molimo ea n'a le mona hoseng hona. U na le Matla a ts'oanang. 'Me tsona—tsona lintho tseo U li entseng hoseng hona, U ka li etsa hape bosius bona. U ts'episitse li tla hlaha matsatsing a qetelo.

⁹¹ Ba bangata mona ba sitiloe ho bona tumelo e lekaneng. Re U rapela ho ba fa tumelo eo joale. 'Me Moea oa Hao o ke o bonahatsoe har'a rona, hoba U itse, "Mesebetsi eo Ke e etsang le tla e etsa le lona, ba lumelang ho 'Na." Ka baka leo kea rapela, Molimo, hore U tle u Iponahatse u ena le rona mona bosius bona, 'me u sa ntse u re rata. 'Me U batla motho e mong le e mong ka mona, ea sa kolobetsoang, ho tla le ho etsoa setlama se le seng le Uena. Hore le bona ba tle ba be le kabelo mohaung o motle ona o ka fetisoang; ho tsoa ho rona ho ea ho Eena, le ho tsoa ho Eena ho ea ho rona; molato oa rona o lule ho Eena, le mohau oa Hae o tle ho rona. Fana ka sena, Morena. Utloa lithapelo tsa rona, re sa kopa ka Lebitso la Jesu Mora oa Hao. Amen.

⁹² Re eme moriting oa toka ea Molimo o lokileng. Nako le nako ha ba babeli kapa ba le bararo ba kopana ka Lebitso la Jesu Kreste, O ts'episitse ho ba har'a bona.

⁹³ Joale, ha ke tsebe, kea kholoa karolo ea likarete tsa thapelo e nkiloe. Mohlomong ba bang ba lona ba ntse ba ts'oere tse ling. Bongata ba lona ha bo na karete ea thapelo. Ha ho tsotellehe u na le eona kapa ha u na eona. Ha u kula, u a kula. 'Me ha eba... Molimo enoa Ea ngotseng Bibebe ena, na le lumela ho Eena le tiile? [Phutheho e re, "Amen."—Mong.] Ha A ka khutlela har'a rona, ho Ipaka, ka thoko ho thero ea Lentsoe, hore O teng mona, ho kholisa baetsalibe hore O teng mona; ha eba A le teng mona ho folisa bakuli, 'me a ka senola sepheo, joalo kaha A entse mohla A ne a le lefats'eng mona, ana le tla amohela pholiso ea lona ka thabo? Ha eba u tla etsa joalo, phahamisa letsoho la hao, hohle feela. Ha re na ho... ha re na letho la... Nke ke ka tseba likarete tsa thapelo tseo a ba fileng tsona. Re ke ke ra sebelisa likarete tsa thapelo. Feel, uena u rapele, 'me u lumele.

⁹⁴ 'Me ha A ka etsa joalo, 'me A ka itsebahatsa, le tla lokela ho its'oabela ha le sa ikamants'e le Eena. Le tlamehile ho etsa joalo. Joale, phepetso e otlolohileng ke ena. Re nts'itse likarete tsa thapelo ka kerekeng hoseng hona, 'me ra ba biletsha aletareng, ra ba rapella. 'Me Moea o Halalelang oa sisinya ka monyaka o moholo, hofihlela ke ba utloa ba nkhuila ka maphako, e ne e le nako ea ho tsamaea, kahobane ke ne ke fokola. 'Me joale, mona ke re, lona ba se nang likarete tsa thapelo, kapa u le mang, ea lutseng mono har'a lets'oele, u phephetsa. Ke u phephetsa ho etsa sena, ho lumela hore pale ea Jesu Kreste eo ke u boleletseng eona ke 'Nete. 'Me u rapele, ha u kula. Ho sa tsotellehe...

⁹⁵ Hoseng hona, ke lekile ho bona ha nka ke ka fumana batho ba sa keneng tabernakeleng. Bosiung bona, ha ke tsotelle moo u tsoang. U rapele feela. Joale ha Moea o moholo oo o Halalelang oa Molimo, oo re ts'oereng sets'oants'o sa oona mono, ha A ka kena mahareng mona! Le nkutloile ke rera hangata, ka hore U re ts'episitse lintho, hore U tla etsa hoo. 'Me joale mohla A na a le lefats'eng, ha A boela a kena nameng ea rona, O tla etsa ntho e ts'oanang. Joale, ha u kula, u rapele. Kea u phephetsa!

⁹⁶ Phephetsa Molimo, u re, "Molimo, Moena Branham ha a ntsebe. Ha a tsebe letho ka 'na. Empa ha U ka mo lumella feela ho retolohela ho 'na, ha nke ke ame kobo ea Hao, U ntoo bua, ke tla tseba hobane U hokahane le kereke ena." Kereke ke balumeli. "Joale ke tla tseba hobane U sa le eena oa maobane, kajeno, le ka ho sa feleng." 'Me u rapele.

⁹⁷ Ke ikutloa ke etelloa ho etsa hoo. Ha ke tsebe hobaneng ke e entse, empa ke ikutloa ke etelloa ho e etsa.

Joale, ha le ka phahamisa hloho tsa lona.

⁹⁸ Hantle mona, ea nchebileng, ke mosali e monyenyane ea n'a phahamisitse letsoho la hae *joana*, a rapela, metsotsong e 'Maloa e fetileng. 'Me ha a rapelle eena o nts'a rapella motho e mong. Ha ke eso bone mosali eo bophelong ba ka, kamoo ke tsebang. Ha ke mo tsebe ho hang. Empa o ntse a rapella morali oa hae, mabapi le oporeishene. Ha u tsoe naheng' ena. U tsoa Texas. Ke HO RIALO MORENA. U na le karete ea thapelo? Ha u na eona? Ha u e hloke. Lumela ka pelo eohle ea hao.

⁹⁹ Ke tsebile joang o ne o rapella eng? Ha u bone na? Molimo oa Leholimo o senola merero ea pelo. Ana Daniele ha a rialo tsatsing la hae? Molimo o senola morero oa pelo.

¹⁰⁰ Ho na le mosali ea lutseng pel'a hao mono. O ne a thabetse taba eo haholo. O ne a ts'oeroe ke lefu la pelo, 'me o batla ho rapelloa. Joale ha u ka bea letsoho la hao holim'a hae. Ho lokile. Joale, u ka khutlela Chicago 'Me u phele. Amen. Ha ke tsebe mosali eo, le eena, ha ke tsebe ka eena. Empa Molimo o a u tseba. U a bona?

O Ikamahanya le rona. "Ha u ka lumela, tsohle li ka etsoa."

¹⁰¹ Mosali e monyenyane enoa oa mo-Juda, ea lutseng mona, o ne a rapela, le eena. Ke 'nete. O ne u nthapella hore ke u bolelle ntho e 'ngoe. Ke bone bothata ba hao hoseng hona, ka mpa ka se ka bo bitsa. Empa maoto ao esale a u hlopha, a tla fola. Ha ho le joalo u se belaele ka oona.

¹⁰² Ua lumela, le uena, mofumahali e monyenyane ea lutseng mona? Ua lumela ke moporofeta oa Hae, mohlanka oa Hae? Ha ke u tsebe. Molimo o a u tseba. Empa ha E le Moea oa Molimo o nang le rona, joale U tla sebetsa kamoo Jesu a sebelitseng. U ne u rapela, 'me eka ke ile ka huleloa ho uena. Lengeloi la Morena ke leo pel'a hae. Ha u ka lumela, lefu la hao la pelo le tla khaotsa, le athritis. Lebitso la hao ke Mofn. Wisdom. Ke 'nete. U ka khutla ua fola, Mof. Wisdom. Ha ke eso bone mosali eo bophelong ba ka.

Empa, Eena ke Molimo, ha le ka e lumela.

¹⁰³ Mona, shebang mona. Le bona mofumahali e monyenyane ea lutseng mono a phahamiselitse letsoho la hae *joana*, molomong oa hae? Ho na le... Ana ha le bone Leseli leo le lopaletseng hantle holim'a mosali eo mono? Joale, shebang, le theohela ho eena le mo tobile. Ke Le bona le phomola. O na le bothata ka sebete sa hae, o ts'oenngoa ke sebete. Ke bothata ba pululana ea nyooko. Che, u Mof. Palmer. Ke moo. Kea hopola joale ke mang. Ha kea bona pono feela; ke u bona u lutse pel'a Moena Palmer. Ke 'nete, khaitseli. Joale, e-ea u phele. U lumele, ka pelo eohle ea hao.

¹⁰⁴ Ho na mofumahatsana ea lutseng ka mora hae, le eena, ea ileng a sheba holimo, a batla a hloletsoe, hantle ka mora hae. U

nahana lefu la litemetoane la bana ba babeli bao le tla tloha, khaitseli, le ho uena, hape? Joale u ka tsamaea, u ee hae, u thabile u nyakaletse. Bea matsoho a hao holim'a masea, bobeli ba bona ba na le bothata boo. 'Me bothata ba hao bo felile, le bona. Le folile, ka Lebitso la Morena Jesu, kaofela ha lona. Le tla phela, phelang.

¹⁰⁵ Ana lea bona hore Molimo o phelang o a phela kajeno? Boholo ba Hae boa lekana, hohle. Ana ha se Eena? [Phutheho e re, "Amen."—Mong.] Ana ha le batle ho amants'oa le Eena? ["Amen."] Ruri, lea batla. Ehlide, le batla joalo.

¹⁰⁶ Joale ha re inamiseng lihloho tsa rona motsotso. Pele ke... E mphokolisa haholo. Ba bakae ba batlang ho hopoloa thapelong hona joale, ba re, "Molimo, nkauhele. Ke batla ho lumela Morena Jesu joale. Ke—ke batla hore mathata a ka a batalatsoe kaofela joale"? [Phutheho e re, "Amen."—Mong.] Molimo a be le lona.

¹⁰⁷ Morena, Uena ea bileng a tsosa Jesu bafung, Molimo oa Leholimo, kea U rapela, ka baka la bona, hore ba tle ba lumele horeng ena; ho tsoela kapele, ha ba eso etse hoo pele, le ho amants'oa le Jesu Kreste, ka har'a lets'a lena mona, bosiung bona. Hoba Lengolo le buile, la re, "Ha re fela re patiloe le Eena ka kolobetso, 'me re nka kabelo le Eena lefung la Hae, re tla boela re ba le kabelo tshong ea Hae." Eo ke ts'episo. 'Me Mohalaleli Petrose e moholo, oa khale, o re laetse ho, "Baka, le ho kolobeletsoa ka Lebitso la Jesu Kreste ts'oarelong ea libe tsa rona, 'me re tla amohela neo ea Moea o Halalelang." Veke ena eohle...

¹⁰⁸ Ngoetsi ea ka ke ena moo e lutseng, Morena, Loyce, o lapile, o nyoriloe, o itima lijo, 'me o lebeletse. Khaitseli ea ka o lutse morao mane, o lapile, o nyoriloe, o itima lijo, 'me o lebeletse. Oho Morena, romela Moea o Halalelang hona joale ka mokhoa o itseng, ka har'a mohaho ona, 'me o otle meeaa ea bona ka Matla a tsoho. 'Me ba ke ba eme ka maoto a bona, ka Matla a tsoho, 'me ba amants'oe le Jesu Kreste tshong ea Hae. Fana ka sena, Morena.

¹⁰⁹ Ts'oarela sebe se seng le se seng. Lebala ntho e 'ngoe le e 'ngoe e phoso, Ntate, 'me U re fe mohau oa Hao, re sa rapela ka Lebitso la Jesu Kreste.

¹¹⁰ Folisa ba kulang le ba mahlomoleng. Morena, U teng mona. U Molimo. U, U Ipakile, Molimo. 'Me rea rapela, ka ho tseba tlhaho ea Moea oa Hao, hore U ile oa etsa lintho tse 'Maloa oa ntoo ba nyamella, oa ea sebakeng se seng oa kena motseng, le ho tsoa u tsamaea. Empa Ua siea mokolokotoane ka morao, hore Molimo o phelang o na a phela. 'Me kea rapela, Morena Jesu, hore—hore taba ena e ke e itoboketse lipelong tsa batho, ba se lebale le ka mohla hobane Moea o Halalelang o mona ho folisa, le ho pholosa, le ho tlatsa ka ho loka ha Hae. Re rapela ka Lebitso la Jesu. Amen.

¹¹¹ Joale, ho tla kolobetsoa batho ba bakae mona? Na u ka phahamisa letsoho la hao, uena ea hlophisitseng lintho tsa hao. Le ka itokisetsa metsi, metsotsong e 'Maloa feela.

'Me joale re sa emetse Moea o Halalelang, metsotsotso e 'Maloa feela. Ba eso amohele Moea o Halalelang ba bakae mona, 'me ba lakatsa, ba rapela ka cheseho, ho amohele Moea o Halalelang?

Teddy, ha u rata, kapa ba bang ba lona, pianong, hona joale. Re tla bina lifela tse 'Maloa hona joale.

Nakong eo, basali ba itokisetsang ho kolobetsoa, ba eang phaposing e ka *mona*. 'Me banna ba ea phaposing e ka *mona*, ba itokisetsang kolobetso. Le rona, re sa itokisetsa, ketsahalo ena.

¹¹² 'Me re tla be re emetse Moea o Halalelang ho tla ho rona, le ho re senolela lintho tseo A batlang re li etse.

'Me re tla tima mabone, oditoriamong e kholo. Moreri o tla be a le ka har'a metsi ka ntle mona—ka ntle mona, 'me re tla—re tla ts'oara ts'ebeletso ea kolobetso.

Motsotsotso feela, pele u tima lebone, Moena Evans. Ke batla ho bala Lengolo re sa letile, motsotsotso feela, ha le rata. Ba sa qala ho itokisa, ke ratile ho bala Lengolo mona.

¹¹³ Ba bakae ba lumelang ha Molimo o hloka-pheletso? Ehlide. O teng mona hona joale. Ntho feela eo le tlamehileng ho e etsa, ho amohele Moea o Halalelang, ke ho ema le ho Mo amohele. Khele, Matla a Hae a pakile hobane O teng mona. Re ka ba le seriti sa pelaelo joang? Boteng ba Hae, bo halalelang bo bokoang bo phalla holim'a meeaa ea rona! Eka nka hoeletsa, ka lentsoe la ka kaofela, ka baka la ho loka ha Hae. "Efela mohau oa Hae o hlola ka mehla le mehla." O teng mona. Pelo ea ka ea tuka, 'me e tletse thabo le nyakallo e phophomang, ka baka la Boteng ba Hae.

¹¹⁴ Pele ba tima mabone, ke batla ho bala ho Liketso, khaolo ea pele.

'Me ke lumela ha monna e mong le e mong, moreri, kapa motho ea ka mona, moevangeli, kapa mang, hore ntho ena e tla ba teng, ke ho re, Molimo o hloka pheletso. Molimo a ke ke a etsa ntho e 'ngoe ka tsela e itseng, a ntoo fetoha a etse *sena*, ho se etsa—ho se sebetsa ka tsela e 'ngoe. O tlamehile ho e sebetsa ka ho ts'oana, nako le nako. Ha A etsa joalo na?

Ena ebile phatlalatso e tsoileng ho Molimo.

...*Banna ba Iserale, utloang taba ena; Jesu oa Nazaretha, monna eo le mo supisitsoeng ke Molimo ka liketso tse matla ka...meeka le ka mehlolo, eo Molimo o e entseng ka eena har'a lona, joalo ka ha le tseba le lona:*

O entse liketso tsa mofuta ofe, ho paka ha E ne e le Messia? Ka ho tseba mehopolo e pelong ea bona. Na ke 'nete? [Phutheho e re, "Amen."—Mong.] Se boletsoeng ke Petrose, "Ka meeka le mehlolo, Molimo A paka a ne a tsamaea le Eena."

O teletsoe lefu ka morero o tiileng oa Molimo, le ka ho itsebela pele ha oona, 'me le mo thakgisitse ka matsoho a bakhopo le Mo bolaile:

Molimo o mo tsositse, oa mo lokolla litlamong tsa lefu: kahobane ho no ho se kamoo a ka tiisoang kateng.

Hobane Davida ha a 'Moletse o itse, Ke beile Morena ka pel'a mahlo a ka, . . . o letsohong la ka le letona, 'me nke ke ka sisinngoa:

Hobaneng ke, pelo ea ka e thabile ke hona, le leleme la ka le nyakaletse; . . . le eona nama ea ka e tla phomola ka ts'epo:

Hobane u ke ke ua tlohela moea oa ka ngalong ea bafu, Mokhethoa oa Hao o ke ke ua mo lesa hore a bone ho bola.

U ntsebisitse litsela tsa bophelo; u tla nkhorisa ka thabo e tsoang lifahlehong sa ka.

Banna ba heso, ha nke ke le boelle phatlalatsa hore mopatriareka Davida, o na a shoe a ba a patoa, 'me lebitla la hae le sa ntse le le teng har'a rona ho fihlela letsatsi la kajeno.

Empa ere kaha e ne e le moporofeta, . . . a tseba hobane Molimo o 'Maletse ka kano, hore Kreste ka nama, o tla tsoa mofuteng oa hae, a be a—a be a lule teroneng ea hae;

Ka ho iponela hoo pele o boletse tsoho ea Kreste, a re moea oa hae o ke ke oa tloheloa ngalong ea bafu, le ea hae nama e ke ke ea bona ho bola.

Molimo o tsositse Jesu eo, e leng seo rona kaofela re lipaki tsa taba eo.

Oh, hoo ho a ntlihasimolla! Re sa ntse re le lipaki tsa Hae. O na a tsosoe bafung. O a phela, bosiung bona.

Etse hobane a phahamisetsoe letsohong le letona la Molimo, . . . a nke pallo ea—ea Moea o Halalelang ho Ntate, o qhatsitse seo le se bonang, le se utloang joale.

Hobane Davida ha a ka a nyolohela leholimong: empa ke eena ea itseng, MORENA o itse ho Morena oa ka, Lula letsohong la ka le letona,

Ke be ke bee bao e leng lira ho uena bonamelo ba maoto a hao.

Ka baka leo ntlo eohle ea Iseraele e ke e tsebe ka kholiseho, hobane Jesu enoa, eo le mo thakhisitseng, Molimo o mo entse Morena le Kreste.

Joale, o na a bua ka puo efe, hoo lipuo tseo tsohle tsa lefats'e li bileng tsa mo utloa?

Etse ha ba (batho bana) utloa hoo, ba hlajoa lipelo, 'me ba re ho Petrose le... baapostola ba bang, Banna ba heso, re tla etsa joang?

Nakoana e fetileng, ba ne ba "hlanya," ho bona. Joale, ka morao ho theri e matla eo e ne ea sechabeng ka seng se emeng moo, "Banna ba heso, re tla etsa joang?" Eaba ho latela lengolo la litaelo. Eaba o ara-...

Petrose a re ho bona, Bakang, 'me e mong le e mong a kolobeletsoe ka Lebitso la Jesu Kreste ts'oareleng ea sebe, 'me le tla nka neo ea Moea o Halalelang.

Hobane pallo eo e etselitsoe lona,...bana ba lona, le ba bao leng hole kaofela, ba sa tlang ho bitsoa ke Morena Molimo oa rona.

A tiisa ka litaba tse ling tse ngata, a ba khotrotsa a re, Ipoloke mofuteng ona o khopo.

Haese eona Evangeli eo re e bolelang kajeno! "Ipolokeng mofuteng ona o khopo." Ho etsoa mehlolo le meeka e mengata, Boteng ba Jesu Kreste bo Mo hlahisa a phela. 'Me eona kolobetso e ileng ea laeloa mona, e laeloa hantle mona sefaleng, hape, bosiung bona.

Eaba ba amohetseng polelo ea hae ka thabo ba kolobetsoa: 'Me barutua ba ekeletsoa tsatsing leo ka batho ba likete tse batlileng ho ba tharo.

¹¹⁵ Molimo o ratehang, bao, liphaposi li tletse batho ba iketsang setlama se le seng le Uena kolobetsong. Kea U rapela, Morena, sebakeng sa bona, hore Uena ka mosa, Morena, horeng ena, ha ba fihla metsing, ba ke ba hlaheloe ke ntho e 'ngoe, meeaa ea bona e tle e tlatsoe ka Moea o Halalelang. Ba ke ba tle ba tsoe metsing, ba ee ho U bonahatsa ka ho bolela Evangeli, ho ruta sekolo sa Sontaha, ho bua ka lipuo, ho fetolela lipuo, ho etsa liponts'o, mehlolo le meeka, 'me, holim'a tsohle, lerato la Molimo le ntse le tuka meeng ea bona, ka bonolo, le mosa, mamello, le boikokobetso.

¹¹⁶ Morena, ke ba neela Uena. Ke likhau tsa tsoseletso ena. 'Me ke U rapela ho ba boloka tlhokomelong ea Hao. 'Me ka letsatsi le leng, ke sa eme mona ke rapela holim'a Bibebe ea Hao, hoba ke rere ho tsoa ho Eona, le ho hhalosa ka pelo ea ka eohle seo ke nahanang e le 'Nete, kamoo U tla nts'enolela Eona.

¹¹⁷ 'Me, Morena, re emetse kolobetso ea bona, ka mokhoa o ts'oanang le oo rona bohole lets'oele lena mona re emetseng

tsoho. 'Me ka letsatsi le leng, Morena, re eme re letile libakeng tsa Leholimo, ho ke ho hlahe molumo Leholimong. Terompeta e tla lla, 'me ba shoetseng ho Kreste ba tla tsoha, pele. Re ke re 'nkoe le Eena, ho kopana le Morena sebakeng, 'me re be le Eena kamehla. Fana ka sena, Ntate.

¹¹⁸ Re boloke bophelong bo atlehileng, re thabile, re bile re tletse cheseho. Ha re kope chelete. Ha re kope lintho tse bonolo. Re mpa re kopa ho ts'oana le Jesu. Re batla ho etsoa setlama se le seng le Eena, ka mofuta oa Moea o no o lutse ho Eena, bonolo, mosa, kamehla a le mosebetsing oa Ntate.

¹¹⁹ Morena, horeng e koalang tsoseletso ena, le ka boikamanyo bona ba batho ba bangata ba khabane, uh, U ke u tsoelepele ho ikamants'a, ka ho ba abela Moea o Halalelang. Fana ka sena, Ntate.

¹²⁰ Hlohonolofatsa tabernakele e nyenyane ena, hlohonolofatsa moreri e mong le e mong, motho e mong le e mong ea ileng a eta, kereke e 'ngoe le e 'ngoe e ne etetse koano.

¹²¹ Morena, ke U rapela ho romella kereke e 'ngoe le e 'ngoe lefats'eng tsoseletso. Joale re tla ba bona ba kopana ka pelo e le 'ngoe le ka khopolo e le 'ngoe, mohau o hloibilang oa Jesu Kreste o tle o abjoe har'a bona. Re e kopa ka Lebitso la Jesu. Amen.

¹²² Joale mabone, a tla tingoa nakoana, oditoriamong e kholo. Lisakatuku tsena li rapeletsoe. 'Me joale mabone a tla tingoa nakoana, 'me joale—'me joale le khutse. 'Me moreri o tla kolobetsa, e mong a latele e mong hantle, hofihlela re ba qeta.

¹²³ [Moena Branham le baena ba hlophisa thepa ea kalana ka tsela ese, ho lokisetsa ts'ebeletso ea kolobetso—Mong.] Joale haeba motho e mong le e mong a khona ho bona.

¹²⁴ Joale, maeke o mong oo, hulelang maeke oo tlase mane tankeng. Ee. Ke hantle. [Motho e mong o emisa ts'epe ea maeke hantle—Mong.] Ho batla ho le betere. Ee. [Moena e mong o re, "Hore re tle re hatise hantle haholo."] Ona o ea khatisong? ["E."] Ho lokile. E eang le e etse! . . . ? . . .

¹²⁵ Ke ne ke batlile ho etsa sena, ka bo-nna, bosiung bona. Ke mpa ke futhumetse haholo. 'Me esale Moena Neville a phomotse, ka hona re batla molebeli a be le kabelo tabeng ena, le eena, moena ea khabane haholo.

¹²⁶ Motsotso feela, mabone a tla tingoa, ka oditoriamong, joale le ka khona ho bona, ka galase e kholo e leketlang ka mora eona, e nyaretse ka har'a lets'a hantle moo ba tla hlaho, ho lokisa, hang feela ha ba ba hlophisitse.

¹²⁷ 'Me nako le nako, ha ba kolobetsa, ba tla . . . baholo ba tla koala likharetene. Li tla sira basali, ha ba tsoa metsing. 'Me joale ba tla tla, e mong a latela e mong. U tla bolela lebitso la hao, u bolele hore u mang, le ho kolobetsoa ka Lebitso la Jesu Kreste.

¹²⁸ Joale, le hopole, joalo ka—joalo ka moreri, ea jereng boikarabelo ba Evangeli ena eo ke e laetsoeng. Ke tla rata ho eletsa motho ea eso kolobetsoe ka Lebitso la Jesu Kreste, ho kolobetsoa hape. Ke seo Pauluse a se buileng. Esita leha ba ne ba kolobelitsoe ka tsela e 'ngoe, e se ka Lebitso, a re ba boele ba kolobetsoe, ka Lebitso la Jesu Kreste.

¹²⁹ A re, "Ha Lengeloi le ka tla, la ruta ntho ese, A rohakoe." Taba eo e fumanoa ho Bagalata. Bagalata, khaolo ea 1, temana ea 8. "Leha rona, kapa Lengeloi le tsoang Leholidong, le bolela evangeli ese, eena e be anathema ho lona."

[Ho buloa lesira la bokolobetso—Mong.]

¹³⁰ Joale, pele ts'ebeletso e qala, na motho e mong le e mong o a bona?" [Phutheho e re, "Amen." Moena Neville o kolobetsa batho—Mong.]



Ho ETSOA SETLAMA LE KRESTE SST59-1220E
(Identified With Christ)

Molaetsa wona o tlileng ka Moena William Marrion Branham, o rerilweng tshimolohong ka Senyesemane ka Sonatha mantsiboya, Tshitwe 20, 1959 mane Tabernakeleng ya Branham mane Jeffersonville, Indiana, U.S.A., o ntshitswe mabanteng a kgatiso a makenete mme o ngotswe o sa kgutsufatswa ka Senyesemane. Phetolelo ena ya Sesotho sa Borwa e phatlaladitswe ka 2006 ke ba ha:

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org